

---

## PWYLLGOR YMGYNGHOROL HARBWR PORTHMADOG 4/3/15

---

### YN BRESENNOL:

Y Cynghorydd Alwyn Gruffydd (Cadeirydd)  
Y Cynghorydd Selwyn Griffiths (is-gadeirydd)

Y Cynghorwyr: Jason Humphreys (Cyngor Gwynedd), ynghyd â David Eastwood (Cynrychiolydd Buddiannau'r Harbwr), Dr John Jones-Morris (Cynrychiolydd Buddiannau Hamdden) a Robert Owen (Cynrychiolydd Buddiannau Masnachol).

**HEFYD YN BRESENNOL:** Barry Davies (Swyddog Morwrol a Pharciau Gwledig), Malcolm Humphreys (Harbwr Feistr Porthmadog) a Bethan Adams (Swyddog Cefnogi Aelodau a Chraffu).

**YMDDIHEURIADAU:** Y Cynghorydd Mandy Williams-Davies (Aelod Cabinet – Economi), David McLean (Buddiannau Perchnogion Tir) a Peter L. Williams (Sefydliad y Bâd Achub).

### 1. TEYRNGED

Talwyd teyrnged gan y Cadeirydd i'r diweddar Gwyn Davies, Cynrychiolydd Cyngor Tref Porthmadog a Mike Biggs, cyn Harbwr Feistr Porthmadog.

Safodd yr aelodau fel arwydd o barch.

### 2. DATGAN BUDDIANT PERSONOL

Ni dderbyniwyd datganiad o fuddiant personol gan unrhyw aelod oedd yn bresennol.

### 3. COFNODION

Llofnododd y Cadeirydd gofnodion cyfarfod y Pwyllgor hwn a gynhaliwyd ar 8 Hydref, 2014, fel rhai cywir.

Mewn ymateb i gwestiwn gan aelod parthed triniaeth diheintio uwchfioled (UV) ym Mhorthmadog, nododd y Swyddog Morwrol a Pharciau Gwledig ei fod wedi anfon neges e-bost at Dŵr Cymru ar 10 Hydref 2014 ynghlŷn â'r mater a derbyniwyd neges yn diolch am y sylwadau gan nodi nad oedd penderfyniad wedi ei wneud. Nododd y byddai'n cysylltu'n anffurfiol dros y ffôn efo Dŵr Cymru er mwyn derbyn diweddariad.

### 4. ADRODDIAD Y GWASANAETH MORWROL

#### a) Cod Diogelwch Harbyrau

Ymhelaethodd y Swyddog Morwrol a Pharciau Gwledig ar y broses a ddilynir i sicrhau y cydymffurfir a'r Cod Diogelwch Harbyrau. Adroddwyd na dderbyniwyd pryderon gan aelodau'r Pwyllgor yng nghyswllt y cod. Rhoddwyd cyfle i'r aelodau godi materion yng nghyswllt y cod ond nid oedd mater yn codi.

#### b) Pwyllgorau Ymgynghorol Harbyrau

Adroddwyd bod camau wedi eu cymryd i geisio cadarnhau cynrychiolaeth Pwyllgorau Ymgynghorol Harbyrau. Nodwyd y cyflwynir Gorchymyn Adolygu Harbwr Porthmadog 1998 gerbron yr Aelod Cabinet – Economi i gadarnhau cynrychiolaeth ar y Pwyllgor hwn.

Mewn ymateb i ymholiad gan aelod parthed sylwedydd y Pwyllgor hwn ar y Pwyllgorau Ymgynghorol Harbyrau eraill, nododd y Swyddog Morwrol a Pharciau Gwledig y byddai'n hysbysu'r aelod o'r sylwedydd.

### c) **Marchnata**

Nododd aelod bod angen cynyddu cyhoeddusrwydd yng nghyswllt yr Harbwr, er enghraifft, drwy'r wefan neu ddefnyddio gwe-gamerâu.

Mewn ymateb, nodwyd nad oedd cyllideb ar gyfer marchnata ond rhoddir hysbysebion yng nghylchgrawn 'Practical Boat Owner' (PBO). Ychwanegwyd bod lleihad yn y niferoedd yn holl harbyrau Gwynedd yn ogystal â Chymru yn gyffredinol ond gobeithir y byddai'r dyfroedd gwych sydd yng Ngwynedd yn denu pobl yma.

Mewn ymateb i sylw gan aelod parthed Plas Heli ym Mhwlheli, nododd y Swyddog Morwrol a Pharciau Gwledig ei fod yn ffyddiog y byddai'r datblygiad cyffrous yma yn creu cyfleoedd ar gyfer yr harbyrau eraill yn ogystal â buddion i'r ardal yn ehangach.

Nododd y Swyddog Morwrol a Pharciau Gwledig y byddai'n cysylltu efo'r Uned Marchnata yn yr Adran Economi a Chymuned yng nghyswllt y cyfleoedd marchnata posib ond gan bwysleisio bod pwysau cyllidebol ar draws y Cyngor.

### ch) **Mordwyo ac Angorfeydd**

Adroddwyd bod y cymhorthion mordwyo yn y manau priodol a'r llusernau yn gweithio ac o'r herwydd nid oedd rhybudd i forwyr yn weithredol.

Tynnwyd sylw mai tua 2 flynedd o waith oedd ar ôl yng Nghwch y Dwyfor. Nodwyd, wedi ei chyfnod ddod i ben, y bwriedir defnyddio contractwyr allanol i gwblhau'r gwaith gan nad oedd cyllid ar gyfer cwch newydd.

Nododd aelod y dylid edrych i mewn i'r opsiwn o lesu cwch o'r fath. Mewn ymateb, nododd y Swyddog Morwrol a Pharciau Gwledig yr asesir yr opsiynau ac adroddir i'r Pwyllgor pryd cyfyd y sefyllfa.

Adroddwyd yr ail-osodir bwiau parth traeth Morfa Bychan yn ystod mis Mai a bod disgwyl byddent oll ar eu safle erbyn Gŵyl y Banc cyntaf ym mis Mai.

Rhodddwyd diweddariad o ran niferoedd angorfeydd parhaol gan dynnu sylw bod 109 unigolyn yn parhau yn yr harbwr gyda photensial o 9 cwsmer newydd. Nodwyd bod un cwch yn suddo'n barhaol felly cymerwyd camau i roi rhybudd 21 diwrnod i berchennog y cwch ei symud cyn cymryd camau i waredu'r cwch.

Adroddwyd y parheir i orfodi lansio cychod o'r safle lansio sydd wedi ei leoli ger prif fynedfa traeth Morfa Bychan yn hytrach na Chwt Powdwr er sicrhau diogelwch yr holl ddefnyddwyr.

### d) **Ystadegau**

Adroddwyd bod y sefyllfa o ran niferoedd cychod yn gyson a'r tuedd yn yr holl harbyrau ac y gobeithir o ganlyniad i brisiau tanwydd yn disgyn y byddai mwy o unigolion yn dod i'r harbwr. Ychwanegwyd y gohebwyd efo 3,000 o unigolion yng nghyswllt yr harbwr gan ddefnyddio dull electroneg ar gyfer 75% ohonynt er mwyn lleihau costau.

### dd) **Cyllidebau**

Ymhelaethodd y Swyddog Morwrol a Pharciau Gwledig ar y gyllideb hyd at ddiwedd Chwefror 2015, gan nodi bod gorwariant ar gyflenwadau ac y rhagwelwyd cynnydd pellach.

Ychwanegwyd y rhagwelir tanwariant o oddeutu £9,000 o dan gostau staff erbyn diwedd Mawrth.

Nodwyd y rhagwelir tanwariant o oddeutu £15,000 ar ddiwedd y flwyddyn ariannol bresennol ac efallai y gwneir benthyciad dros dro i'r harbyrau eraill.

Mewn ymateb i gwestiwn gan aelod, nododd y Swyddog Morwrol a Pharciau Gwledig bod yr incwm o £9,237.45 a dderbyniwyd hyd at ddiwedd Chwefror yn y peiriant talu ac arddangos ym maes parcio Swyddfa'r Harbwr yn cyfrannu at darged incwm yr harbwr.

**e) Ffioedd 2015/16**

Adroddwyd bod ffioedd 2015/16 o gymharu â ffioedd 2014/15 wedi eu cynyddu yn unol â chwyddiant.

Mewn ymateb i sylw gan aelod parthed ffi mynediad cerbydau i Draeth Morfa Bychan a Maes Parcio Machroes, eglurodd y Swyddog Morwrol a Pharciau Gwledig ei fod yn ofynnol i godir ffi yn unol â chwyddiant ac nad oedd cynnydd sylweddol wedi bod yn y ffi ers rhai blynedd. Tynnwyd sylw bod y ffi ar gyfer tocyn tymhorol parcio am 2015/16 yn aros yr un fath.

Holodd aelod os oedd y Gwasanaeth Morwrol wedi ystyried cyflwyno gwasanaeth taliadau digyswllt. Mewn ymateb, nodwyd bod angen moderneiddio'r drefn o gymryd arian ac y gohebir efo Uwch Swyddog Incwm y Cyngor yng nghyswllt gosod peiriannau talu efo cerdyn yn yr harbwr ac efallai ar y traethau.

**f) Staff Harbwr**

Rhodddwyd diweddariad ar sefyllfa staffio'r harbwr. Nodwyd bod Arthur Jones wedi ei benodi yn Uwch Swyddog Harbyrau. Eglurwyd y byddai wedi ei leoli yn Swyddfa Harbwr Porthmadog ond yn cynorthwyo yn Harbyrau Aberdyfi ac Abermaw hefyd.

Llongyfarchwyd Malcolm Humphreys ar gael ei benodi yn Harbwr Feistr ar gyfnod secondiad a dymunwyd yn dda iddo.

Nodwyd y cynhelir cyfweiliadau mewn pythefnos ar gyfer penodi i'r swydd Cymhorthydd Harbwr Porthmadog am y cyfnod o fis Ebrill i fis Medi gyda'r unigolyn a benodir i'r swydd yn unol â'r arferiad blynyddol yn cael ei leoli ar Draeth Morfa Bychan.

**ff) Cynnal a Chadw**

Manylodd yr Harbwr Feistr ar raglen waith cynnal a chadw'r Gwanwyn.

**5. CYFARFOD NESAF**

Nodwyd y caiff y cyfarfod nesaf ei gynnal ar 14 Hydref, 2015 yn ddarostyngedig i'w gadarnhau gan y Cyngor llawn yn ei gyfarfod ar 5 Mawrth, 2015.

Dechreuodd y cyfarfod am 5.35pm a daeth i ben am 6.30pm